



Ruj. Kami : KPM.600-17/1/18 (88)

Tarikh : 04 Februari 2020

**Semua Pengarah Pendidikan
Jabatan Pendidikan Negeri**

YBhg. Dato'/Tuan,

**LANGKAH KESIAPSIAGAAN PENCEGAHAN KEJADIAN JANGKITAN 2019 NOVEL
CORONAVIRUS (2019-nCoV) DI SEKOLAH KERAJAAN DAN BANTUAN
KERAJAAN, KEMENTERIAN PENDIDIKAN MALAYSIA**

Dengan segala hormatnya perkara di atas adalah dirujuk.

2. Kementerian Pendidikan Malaysia (KPM) memandang serius kejadian jangkitan 2019 *Novel Coronavirus* (2019-nCoV) yang berlaku masa kini. Pihak KPM turut sama mengambil berat isu ini agar penularan jangkitan ini tidak berlaku dalam kalangan warga sekolah kerajaan dan bantuan kerajaan KPM.

3. Justeru itu, bersama-sama ini dikemukakan langkah kesiapsiagaan bagi mencegah penularan jangkitan 2019-nCoV untuk tindakan pihak sekolah selanjutnya. Ini bagi memastikan kualiti kesihatan warga sekolah terutamanya murid-murid sentiasa diutamakan dan terjamin.

4. Jabatan Pendidikan Negeri (JPN) dan Pejabat Pendidikan Daerah (PPD) diminta bekerjasama secara bersepadu dengan Jabatan Kesihatan Negeri (JKN)/Pejabat Kesihatan Daerah (PKD) untuk menyelaraskan aktiviti pencegahan dan pengawalan kejadian jangkitan 2019-nCoV. Sebagai rujukan, berikut adalah langkah kesiapsiagaan yang perlu diambil oleh pihak sekolah untuk mengawal penularan jangkitan berkenaan:

- 4.1 menasihati warga sekolah untuk tidak membuat lawatan ke negara China pada masa ini dan memastikan mereka mengikuti pemakluman mengenai perkara ini yang dikeluarkan oleh pihak Kementerian Kesihatan Malaysia (KKM) dari semasa ke semasa;
- 4.2 memaklumkan bahawa warga sekolah yang mempunyai sejarah tinggal atau melawat bandar Wuhan dan Wilayah Hubei, China perlu diletakkan bawah Perintah Pengawasan dan Pemantauan

...2/

LANGKAH KESIAPSIAGAAN PENCEGAHAN KEJADIAN JANGKITAN 2019 NOVEL CORONAVIRUS (2019-nCoV) DI SEKOLAH KERAJAAN DAN BANTUAN KERAJAAN, KEMENTERIAN PENDIDIKAN MALAYSIA
KPM.600-17/1/18 (88)

Tarikh : *04* Februari 2020

(*home surveillance*) untuk memantau status kesihatan secara penilaian sendiri di tempat tinggal masing-masing **selama 14 hari** dari tarikh berlepas dan mereka **tidak perlu hadir** ke sekolah. Pihak sekolah perlu mengambil tindakan selanjutnya seperti berikut:

- i. mengenal pasti warga sekolah yang tergolong dalam kumpulan yang dinyatakan di atas dan membekalkan butiran peribadi mereka termasuk nama, nombor telefon, alamat tempat tinggal, nama sekolah dan tarikh ketibaan di Malaysia kepada JKN/PKD yang berdekatan untuk dikemukakan kepada *Crisis Preparedness and Response Centre* (CPRC) Kebangsaan;
 - ii. memaklumkan kepada mereka untuk mendapatkan rawatan di hospital jika mengalami gejala jangkitan saluran pernafasan seperti demam, batuk atau sesak nafas dalam tempoh tersebut; dan
 - iii. mereka hadir semula ke sekolah setelah disahkan sembuh oleh KKM.
- 4.3 memaklumkan bahawa warga sekolah yang mempunyai sejarah melawat negara China **selain** bandar Wuhan dan Wilayah Hubei perlu memantau status kesihatan secara penilaian sendiri. Sekiranya tiada gejala jangkitan saluran pernafasan mereka boleh hadir ke sekolah. Namun, jika mereka mengalami gejala ini dalam tempoh 14 hari selepas ketibaan di Malaysia, mereka perlu segera mendapatkan rawatan di hospital;
- 4.4 menasihatkan murid dan warga sekolah yang lain untuk segera mendapatkan rawatan perubatan sekiranya mengalami gejala seperti demam, batuk atau sesak nafas dan menasihatkan mereka agar tidak hadir ke sekolah sehinggalah mereka sembuh;
- 4.5 jika terdapat murid atau warga sekolah yang bergejala tetapi masih hadir ke sekolah, mereka perlulah diasingkan seperti di bilik kesihatan sementara menghubungi ibu bapa/penjaga untuk menjemput anak/anak jagaan mereka pulang dan mendapatkan rawatan selanjutnya. Bagi warga sekolah lain yang menunjukkan gejala tersebut, pelepasan perlu diberikan untuk mereka pulang dan mendapatkan rawatan lanjut;

LANGKAH KESIAPSIAGAAN PENCEGAHAN KEJADIAN JANGKITAN 2019 NOVEL CORONAVIRUS (2019-nCoV) DI SEKOLAH KERAJAAN DAN BANTUAN KERAJAAN, KEMENTERIAN PENDIDIKAN MALAYSIA

KPM.600-17/1/18 (88)

Tarikh : 04 Februari 2020

- 4.6 sekiranya terdapat kes warga sekolah yang disahkan positif mendapat jangkitan penyakit ini, pihak sekolah perlu melaporkan kepada JKN/PKD untuk tindakan kawalan pencegahan wabak secara serta merta dan pihak sekolah perlu mematuhi nasihat dan arahan selanjutnya oleh JKN/PKD;
- 4.7 memastikan murid yang tinggal di asrama yang bergejala diasingkan sementara menghubungi segera ibu bapa/penjaga untuk menjemput anak/anak jagaan mereka pulang dan mendapatkan rawatan selanjutnya;
- 4.8 mendapatkan kerjasama dengan JKN/PKD untuk menjalankan saringan suhu di pintu masuk sekolah bagi mana-mana sekolah yang melaporkan kejadian jangkitan atau ketidakhadiran dalam kalangan warga sekolah yang tinggi. Dapatan daripada aktiviti saringan suhu ini perlu dilaporkan kepada pihak PPD dan JKN/PKD yang berhampiran;
- 4.9 mewujudkan kesedaran mengenai kepentingan menjaga kebersihan dan kesihatan diri kepada warga sekolah, khususnya murid-murid. Mereka perlu diingatkan agar sentiasa mengekalkan tahap kebersihan diri yang tinggi, amalan kerap membasuh tangan dengan menggunakan air dan sabun atau *hand sanitizer*, mengamalkan adab batuk yang baik dan mengamalkan cara hidup sihat;
- 4.10 menasihati murid terutama yang bergejala untuk berada di rumah dan tidak pergi ke tempat tumpuan ramai. Sekiranya perlu ke tempat awam, mereka dinasihatkan untuk memakai penutup mulut dan hidung (*face mask*); dan
- 4.11 memberi kefahaman kepada ibu bapa/penjaga mengenai peranan mereka dalam usaha mencegah penularan wabak jangkitan penyakit ini di sekolah dan peka kepada status kesihatan anak/anak jagaan mereka serta tidak menghantar anak/anak jagaan mereka yang sakit ke sekolah sehingga sembuh sepenuhnya.

5. Semua pihak termasuk JPN/PPD/sekolah dimohon supaya mematuhi arahan dan mengikuti nasihat yang dikeluarkan oleh pihak KKM berkaitan perkara ini dari semasa ke semasa.

**LANGKAH KESIAPSIAGAAN PENCEGAHAN KEJADIAN JANGKITAN 2019 NOVEL
CORONAVIRUS (2019-nCoV) DI SEKOLAH KERAJAAN DAN BANTUAN
KERAJAAN, KEMENTERIAN PENDIDIKAN MALAYSIA**

KPM.600-17/1/18 (88)

Tarikh : *04* Februari 2020

6. Sebarang tindakan penutupan sekolah adalah berdasarkan nasihat/input teknikal daripada JKN/PKD. Namun, diingatkan bahawa arahan penutupan sekolah atau kelas adalah bawah bidang kuasa Pengarah JPN.

7. YBhg. Dato'/Tuan dimohon mengambil tindakan memaklumkan kandungan surat ini kepada pegawai yang bertanggungjawab di JPN, PPD dan sekolah bawah pentadbiran pihak YBhg. Dato'/tuan.

Segala perhatian pihak YBhg. Dato'/tuan berhubung perkara ini amat dihargai dan didahului dengan ucapan terima kasih.

Sekian.

"BERKHIDMAT UNTUK NEGARA"

Saya yang menjalankan amanah,



(HAJJ ADZMAN BIN TALIB)

- s.k.
1. Ketua Pengarah Pelajaran Malaysia
Kementerian Pendidikan Malaysia
 2. Timbalan-timbalan Ketua Pengarah Pelajaran Malaysia
Kementerian Pendidikan Malaysia
 3. Pengarah
Bahagian Perancangan dan Penyelidikan Dasar Pendidikan
 4. Pengarah
Bahagian Pengurusan Sekolah Berasrama Penuh
 5. Pengarah
Bahagian Sukan, Kokurikulum dan Kesenian
 6. Pengarah
Bahagian Pendidikan dan Latihan Teknikal Vokasional
 7. Pengarah
Bahagian Pendidikan Islam
 8. Pengarah
Bahagian Pendidikan Khas